

Poloni Filipai Imboma Pipia Topa Tirimu Ungumu

Filipai

I Ungu Torumumunga Ungu Pulu Mare

Rom kombu ka ulkena molopalie wali Poloni i pipiamu topa mundurumu. Lino tono kolamili nimbe umbuni mepo Kraist kinye kopu tepo molamili nimbe ungu mane tirimu. Kolo toli ungu mane tirimele imbomani lino embambo naa tiengei kane kane molamili nimbe mundurumu.

Goteni nu Jisas Kraist kinye konopu tendekuna pupili molani nipili!

Kraustinga Filipai imboma Pol kinye tapu toko moloringimunga Pol paa konopu tirimu ungumu

1 ¹ Ilto Pol Timoti talo, Kraist Jisasinga kongono iye taloni pipia topo, ulke kombu Filipai moromele imbo Kraist Jisasini yunge talapena tukundo ltimu imboma timbilindo torombolo. Eno we ungu pileli imboma kinye, enonga tapu iyema kinye, Kraustinga imbomanga kongono tendeli iyema kinye, eno pali timbilindo i pipiamu topo tirimbolo.

² Linonga Lapa Gote kinye Awili Jisas Kraist kinye, eloni eno kinye konopu noiko konopu u nipili molangei nengili.

Poloni Gotendo paa tereno nimu ungumu

³ Nani eno waliwalima konopuni pilipolio nanga Gote kinye paa tereno nio. ⁴⁻⁵ Na ungu tukumemu pulu polopo eno topo tiru wali kape yandopa yandopa kano kongonomu tero wali kape enoni kongono popo tiko tendeko na liko tapondoromelemunga Gote kinye enonga konge tendepolio wali tono kolopo konge tendepo moro. ⁶ Nani pilipolio, Goteni eno kinye kongono pulu polopa terimu kongono pengamu telipe pumbe pumbe, Kraist Jisas yando omba lino limbelo walimunga kano kongonomu tepa pora timbelo nimbo paa lipo manjiro.

⁷Na eno konopuni pilipo andopo morona na enondo konopu lteo mele paimbo lteo. Na ka ulkena pero wali kape, ungu tukumemu nimbo tipo yu paa paimbo ungumu imboma paa pilko liengei nilipo andoru wali kape, enoni na liko tapondoromelena na kinye eno kinye lino Goteni we kondo kolopa lipe tapondoromo. ⁸Kraist Jisasini eno kondo kolopa konopu mondoromo mele nani aku tepo eno kondo kolopo konopu mondopolio waka ltemona kanamboa konopu lteo. Goteni aku ungu paa nio nimbe lipe manjirimo.

⁹⁻¹⁰Nani Gote enonga konge tendero mele i tepa: Enoni ulu keri pengama moke teko kondokolio ulu pengama kau pilko liko teaio nimbo eno Gote kinye Kraist talo peya elonga imboma peya konopu mondoromele mele paa olando olando mondoko mololiko pungo, enonga lipe manjilima kinye ulu keri pengama moke teli ulu pulumu kinye enonga konopumanga pepa ti nilipe pupili konopu mondoko molaio nimbo enonga nimbo Gote konge tero. Aku teko molonge kano kinye Kraist altopa ombalo walimu wendo ombalo kinye eno konopu kake tepili molko yu kanopa penga pimo ulu puluma kau enonga konopumanga pepili molko, ¹¹Jisas Kraistini eno kinye kopu tepa molopa lipe tapondoromomunga yu kanopa tumbi nili uluma nimbe karomo uluma kau teko molonge. Eno aku teko teko molonge wali lupe imbo karomelemani Gotenga imbi liko ola munduko yu kapi nengei nimbo aku tepo Gote enonga nimbo konge tero.

Pol ka ulke perimumuni Gotenga ungu ame tolimu taporumu

¹²Ango kame, na kinye ulu umbuni wendo omo akumuni ungu pengamu pipi naa timo. Na ka tiringi ka ulkena pero ulumuni ungu pengamu tepa enge tirimomu eno liko manjengei nimbo tiro.

¹³Akumunga Rom iye nomi king Sisaramunga ulkemu nokoromele ami iyema kinye we imboma pali na Kraistinga kongonomu tenderomunga ka tiringi ka ulkena pero ningko karomele. ¹⁴Na ka ulkena peromunga nanga angenupili awinini kanokolio Awilimuni lino paimbo lipe tapondombalo ningko pilko konopu enge nipili pipili naa kolko Gotenga ungumu enge ningko ningko tilko andoromele.

¹⁵Paimbo, iye mareni na kombu awininga andopo ungumu nimbo tirumunga imbo awini kano ungumu pilko limele mele kanoko keri pilkolio Polonga imbimu mainye pupili, linonga imbima ola molopili ningko Kraistinga ungu ningko tirimele nalo mareni konopu penga pepili Kraistinga imbimu ola molopili ningko Kraistinga ungumu ningko tirimele.

¹⁶Na ungu pengamu yu paa paimbo nilipo andoromunga ka ulkena pero mele kanokolio na konopu mondokolio Kraistinga ungumu ningko tirimele; ¹⁷nalo iye mareni konopu tumbi tipe naa pepili enonga imbi ola molopili ningko Kraistinga ungumu ningko tirimele. Na ka ulkena pero kinye umbuni mare olandopo tiemili ningko aku teremele.

**Pol ka ulkena pepalie na kolombo kinye molo molombo wali
Kraist peya morombolo mele molombo nimu ungumu**

18-19 Nalo na mindili nopo ningi ningo aku teremele mele ulure peremoya? Eno konopu penga pepili Gotenga ungu ningi tirimele molo konopu tumbi tipe naa pepili ningo tirimele akumu ulure molo. Eno wayeni Kraistinga ungumu imboma ningi tirimelemunga na paa tono kolopo moro. Tono kolopo molombomunga ulu te peremola. Na pilipolio, na ka ulkena pepo mindili noro wali enoni Gote nanga konge tenderemelemunga kape, Jisas Kraistinga Minimu yu na kinye molopa na lipo tapondoromomunga kape, i ulu talonga na ka ulkena wendo pumbo molombo nimbo pilipolio tono kolopo moro mele molombo. 20 Nani teambo konopu lteo mele i tepa na tero mele kape moro mele kape akumunga pipili naa kolopo Kraistinga kumbekerena angilimbo wali paa nimbo yunge kongonomu enge nimbo tero. Molondu lemo kape molo kolondu lemo kape nanga kangimuni Kraistinga imbi lipo ola mundumbo nimbo aku tero. 21 Na i konopu lteo. Na koinjo molondu lemo na Kraist kinye kopu tepo molombo nalo na kolondu lemo na paa penga tepe molombo. 22 Maina we molondu lemo nani imboma Gote kinye molangei kongono we ltemomu manda tembo. Akumunga kolombomu kinye koinjo molombomu kinye kano ulu talonga te tembonje na naa lipo manjiro. 23 Na konopu talo peremo. Mai kombumu tiye kolopo Kraist moromona pumbo peya molombolomunga na tono teremona moro. Aku tendu lemo penga. 24 Nalo eno tapomboindo mai kombuna we molombo aku paa penga. 25 Nani eno lipo tapondombo kinye eno Kraistinga imboma molko kondoko tono kolko enge ningi ipuki tiko molangei nimbo pilipolio na eno kinye peya mai kombuna paimbo molomolo nimbo enge nimbo ipuki tiro. 26 Akumunga pele, na eno molongena altopo yando ombo peya molomolo kinye enoni tono kolko Kraist Jisasinga imbimu liko ola mundengei.

**Goteni Filipai imboma enge tirimuna enge ningi
molaio nimbe Poloni nimbe tirimu**

27 Nalo, na ondu lemo kape naa ondu lemo kape ulure molo. We imbomani lino kanokolio paimbo Kraistinga imboma moromele ningi kanangei ningi Kraistini yu lombili andolima moromele mele nimbe tirimu mele eno aku teko molaio. Aku teko molonge ulumu paa awilimu. Pele,aku ulu teko molangei ombo mongoni kanondu lemo molo eno teko moromele mele temane te ka ulkena molopolio pilendu lemo eno konopu tendekuna pupili enge ningi molko, imboma Kraist yu paimbo imbomanga tepe lilimu ningi enge ningi pilengei ningi ungu pengamu toya toko ningi tirimele ulu konopu lipo manjiro. 28 Enonga opa pule

imbomani eno mini lteangei ningi ulu mare teremele kinye ulure molo ningi mini naa ltek we angimele mele pilebo nimbo moro. Enonga opa pulemani eno mini naa ltek we angilinge ulu kanokolio eno opa pulema molko kenjinge nalo eno Kraistingu imboma molko kondongena liko manjinge. Goteni eno tapondopa opa pulema topa mainye mundumbelomunga aku teko liko manjinge.²⁹ Goteni eno tepa kondopalie Kraistingu kongono teaio nimu. Eno ipuki kau tiko we molaio ungu naa nimu. Aku molo. Yunge kongono tendenge wali eno mindili nongei nimu.³⁰ Oi na Kraistingu kongono tendepo opa teru kanomu, kinye enge nimbo opa we tepo moro piltiemele. Kinye eno mindili nongo molkolio na kinye opa kalale imboma moromele.

**Lino konopu tendekuna pupili molopo imbo
lupema tepo kondamili ungumu**

2 ¹Kraistini enonga konopu enge tirimoya? Eno paa konopu mondopa enonga konopu tepa ame tondoromoya? Eno Mini Kake Telimu kinye kopu teko moromeleya? Eno imbo lupema kondo kolko teko ame tondoromeleya? ²Aku tenge lemo eno konopu tendekumu kau leko, enongan nendo yando konopu mondoko molko, enonga konopu tendekuna pupili molko aku ulu tenge wali na teko tono kondonge.³ Eno na imbo awili te molambo, nanga imbi ola molopili ningi naa molaio. Na kamakomu moro, nanga imbi paa olando moromo ningi pilko eno none teko naa molaio. Eno molonge mele i tepa, imbo lupema awili moromele, na imbo mandopamu moro ningi aku teko pilko molaio.⁴ Eno enongan konopu kau naa leaio. Enonga imbo lupema teamili ninge mele pilko liko molko kondangei ningi tapondaio.

**Kraist Jisas Yu iye timborimbo mele molorumuna
Goteni Yu lipe paa olando mondorumu ungumu**

⁵Kraist Jisas konopu lerimu mele enoaku teko konopu leaio. ⁶Yu paimbo Gote moromo naloaku tepo Gote moro mele molambo konopu naa lerimu. Aku molo. ⁷Yu Gote molorumu mele tiye kolopa kongono tendeli kendemande iye te molambo nimbe yu imbo imboma moromele meleaku tepa imbo iye apuwe lerimu. ⁸Yu imbo iyemu molorumuna kanoringi kano kinye na imbo iye molambo nimbe molopa, Goteni tewi nimu uluma pali pilipe lipe terimu. Nu kolani, unjo polopeyana uku toko panjengei nimu ungumu kape tiye naa kolopa pilipe lipe yu kolorumu. ⁹Aku ulu pulumunga Goteni yu paa olandopa lipe mondopa, imbi te we imbima pali topa mainye mundupe paa olandopa moromo imbimu tirimu. ¹⁰Jisasinga imbimu pilkolio mulu kombuna tukundo moromele imboma kinye, maina moromele imboma kinye, kolkolio maina mainye peremele imboma kinye, enoni pali yu imbi liko ola munduko, Yu iye Awilimu

molopili lino mainyendopa molamili ningyo yunge kumbekerena komongo toko pondoromele.¹¹ Ara Gote yunge imbi kapi nengei nimuna wayeni i teko ningyo para tinge. Jisas Kraist yu Awili ningyo.

Lino imboma kinye molomolona pa telima molamili ungumu

¹² Nanga imboma, Kraist Jisasini aku terimu mele pilkolio nanga unguma oi waliwalima pilko tenge tiko teringi mele, kinye kape tenge tiko teangei. Na eno kinye molopo teaio niu wali pilko liko teringi mele, kinye na eno kinye naa moro wali kape nani teaio nio mele liko awili tiko pilko liko teko molangei. Goteni eno mindili nonge aulkena naa pangei nimbe oi wendo ltimumunga yu kinye popo tiko moromele mele aku tepo we molamili, aku tepo molomolo mele melteni pipi timbelonje ningyo Gotenga kumbekerena pipili kolko mini lteko Goteni we timbo nimu melema paa liemili ningyo akuma lingei kongonomu mindili nongo teko molaio.¹³ Aku ambe telka, Gote eno kinye molopa, yuni teko molangei nimbe konopu ltemo mele teangei nimbe engema tipe lipe tapondopa, teamolo konopu ltemele ulumu yuni tirimo nimo kani aku uluma teko molaio.

¹⁴⁻¹⁶ Goteni lino kinye ungu te peremo ulu, te naa kanopa, imbo kake telima kau nimbe kanopili. Kinye imbo ulu pengama tiye kolko ulu kalaro mololima kinye ulu pulu kerima kau teremele imboma kinye peya molopo yunge bakuluma tumbi tipo molopo yuni lino kanopa ulu kalaro mololi uluma nimbe naa kanopa imbo tumbi nilima kau moromele nimbe kanopili ningolio eno ulu teremelema pali nendo yando naa ningyo karaye naa teaio. Kano imbo kerima koinjo mololi ulumu peremo ungumu pilko liengei ningyo tirimelemunga kano imboma moromelena tipe lam mele molko pa tenderemele. Aku tenge kinye, Kraistainga walimu wendo ombalo kinye eno kanopolio nani eno kinye mindili nombo kongono teroma we naa teru. Nanga ungu enge nimbo nioma mainye naa pumo nimbo kanopolio na paa eno kinye tono kolombo.¹⁷ Juda imbomani Gote popo toko melema kalko tikolio, mingi te no wain moromomou liko Gotenga kumbekerena kamukumu ondoko munduko tirimele mele enoni Gote ipuki tirimelema kinye, yunge kongonomu tenderemele kinye, yunge popo toko tirimele mele akumunga olandopa na Pol kolombo ningyo tongei wali nanga mememu no wain mele ondopa ombla pumbelonje. Aku lemo na tono kolopo, eno kinye peya paa tono kolombo,¹⁸ Na kinye aku ulu wendo omo lemo na eno kinye tono kolombo, akumunga eno kape tono kolko na kinye peya paa tono kolonge.

Poloni Timoti kinye Epafroditus talo ulke kombu Filipai pangili lipe mundurumu ungumu

¹⁹ Awili Jisasini ee nimo lemo nani nondopo Timoti eno moromelena opili nimbo. Yu kelepa yando ombalie eno moromele mele na temane

topa timbelo pilipolio na konopu penga pembalo. ²⁰Timoti na kinye kopu tepa molopa eno molko kondangei lipo tapondombo nimbe moromo mele imbo lupe te aku tepa naa moromo. ²¹We imboma pali Jisas Kraist lipo tapondopo yunge kongonomu teamili naa ninga enonga melema kau konopu kimbo tiko pilko moromele. ²²Nalo Timoti tepa kondoromo mele eno pimele. Bakulu teni yunge lapa lipe tapondoromo mele yu kinye ilto ungu pengamunga kongonomu peya kopu tepo terembolo. ²³Akumunga eno moromelena yu opili nimbo lipo mundumboi tero. Otili akinjo na kinye ambele ulure wendo ombalonje nimbo nokoro. Pele pilipolio, yu eno moromelena opili nimbo welea lipo mundumbo. ²⁴Na kape Awilimuni na lipe tapondombalo kinye nondopo eno ombo kanombo konopu lepo ipuki tiro.

²⁵Nalo kinye i teli oi enoni na lipe tapondopa nokopili ningko liko munduringi iye Epafroditus eno moromelena altopa opili paa lipo mundumbo konopu lteo. Yu linonga angenu, na kinye peya kopu tepo kongono tepo, Gotenga ungu tukumemu mainye naa pupili nimbolo peya opa terembolo iyemu. ²⁶Eno altopo kanamboa nimbe molopa, yu kuro torumu ungu pileringimunga yu konopu umbuni tepili moromo. ²⁷Yu paimbo kuro torumu, yu pondeanga kolorumu. Kolka nalo Goteni yu kondo kolopa tepa koinjo ltimu. Goteni yu kau kondo naa kolorumu. Yu kolombalo kinye na kinye umbuni awilima membo nimbe pilipelie na kape kondo kolopa yu tepa koinjo ltimu. ²⁸Akumunga eno yu altoko kanokolio kuro pora nimu ltemo ningko tono kolangei. Ombalo wali na konopu umbuni awini naa tepili. ²⁹⁻³⁰Yu yunu umbuni te wendo ombalo mele konopuni naa pilipe, yuni Kraistinga kongonomu kau pilipe tepa molopalie kolombai tepa, enoni na lipe tapondopili ningko kongono tiringimu tepo molambo nimbe yu kuro torumu wali kape pilipe kelea kelea lepa we kongono terimu. Akumunga Epafroditus ombalo wali tono kolko panjiko lieio.

Kraist paimbo linonga lipe tapondolimu nimele imboma kau paa imbo tumbi nilima moromele ungumu

3 ¹Nanga imbo ango kame, i pipiamu topo pora timboindo i tepo nio: Eno Awilimu kinye kopu teko moromelemunga tono kolko molaio. Oi pipia te topo lepi lepi topo niu mele altopo pipia tombo kinye tiye naa temballo. Aku tembo wali eno lipe tapondopili kani altopo nembo,

²Iye owa takera mele moromelema kanoko kondoko molaio. Kano iyema eno teko kenjinge iyema, Israel iyemani kangimu kopiko teremele ulumu teko kenjirimele iyema. ³Lino Kraistinga imboma kau paa paimbo kangi pundu kopili Israel imboma moromolo. Lino Gotenga Minimuni lipe tapondoromona Gote popo toromolo imboma moromolo. Kraist Jisasinga imbimu kau lipo ola mundupo, kangindo ulure teremele akumu

lino naa lipe tapondoromo nimbo pimolo imboma moromolo. ⁴Kangindo ulumani manda lipe tapondolkanje na Goteni ulure naa tembalo.

Molopo kondombo nimbo tono kolopo pipili naa kolka. Imbo maren kangindo ulure teremolomunga paimbo manda molomolo ning enge ning pimele lemo nani kape aku tepo manda paimbo nimbo olando enge nimbo pilimboi. ⁵Amani na merimu wali wali kite yupoko pakera ombo purumu kinye ki talo tipemunga nanga kangi pundu kopiringi. Na Israel iyemu, na Benjamin lapu iyemu; ama ara talo Hibru imbo talo, na Hibru iyemu. Na Farisi iye molopo Farisi iyemani Gotenga ungu manema pilko enge ning teremele mele aku tepo pilipo paa teru. ⁶Gotenga ungumu enge nimbo pilipo tepo, yu paa lipo tapondambo nimbo Kraistingu imbo talapemu tepo kenjipo mindili tiru. Na Kraistingu iyemu naa molopolio ungu manema pileringi iyemani mane tiko teao ningi mele paa wamongo tipo terumunga nani ulu te alowa teko, teko kenjirino ning paa naa kanoringi. Kangindo aku tepo tepo molorumunga kangindo teremele mele ulure lipe tapondolkanje na paa paimbo lipe tapondolka.

⁷Ulu akuma lombilkanje naniimboma maindo mundulka. Nalo ulu akuma kanoro wali manda naa terimu. Akumunga na Kraistingu iyemu paa molamboi konopu lepolio yu lombileru. ⁸⁻⁹Juda imbomanga ulu pulumando kau naa niu. Kraist Jisas nanga Awilimu paa pilipo paa kopu tepo morombolo aku ulumu paa penga nimbo we melema kinye uluma ulure molo nimbo tiye kolopo yu kau lombilipuro. Kraist kau ambolopo yunge unguma enge nimbo ipuki tipo tepo, yu kinye kopu tepo molambili nimbo we uluma langi purupe lkupindi toromo kinye toko lteremele melema mele ltemo nimbo pilipo moro. Kinye nani ungu manema pilipo lipo terumunga na Goteni na iye tumbi nilimu nimbe karomo nimbo naa pilto. Na iye tumbi nilimu molambo nimbo aulke te lupe puro. Kraist kau paimbo nanga lipe tapondolimu nimbo ipuki tiro akumu kau iye tumbi nilimu moro aulkemu akirindirimo. Kraist paimbo ningi ipuki tirimele imboma kau Goteni imbo tumbi nilima nimbe imbi tirimo. ¹⁰Na Kraist moromo mele paa lipo manjipo, yu kinye paa kopu tepo kanopo lipo molambili konopu lteo. Kraist kolopa makilipe koinjo molopalie enge te ltimu aku engemuni na molopo tembo mele paa lipe tapondopili. Yu kolombaindo mindili norumu mele na yu kinye peya kopu tepo mindili nombo. Kolombaindo konopuni pilipe molorumu mele na aku tepo molomboi. ¹¹Aku tepolio na Goteni ono kombuna topa makinjipili konopu lteo.

**Poloni imboma melte lingeindo owe toromele mako
peremonu tu arale teko lkiko purumele mele na aku tepo
melte limboindo enge nimbo lkipo puro nimu ungumu**

¹²Nalo na i tepo i tepo molambo niu akumu oi aku tepo molto nimbolio naa nio. Iye paa penga ulu pulu keri naa pelimu moro naa nio. Kraistini

na molopo kondambo nimbe na ambolopa ingi tirimumungaaku mele na ulu akumu paa ambolopo ingi tiembo nimbo kongono enge nimbo tepo moro. ¹³⁻¹⁴Ango kame, ulu akumu oi ambolopo moro nimbo naa pilto. Nalo ulu te paimbo tepo moro, akumu i tepa imbomani melte tinge kinye lingeindo mako toromele owena na oi kumbe lepo lkipo pumbo liemboa ningotu arale teko lkirimele mele na aku tepo Kraist Jisasini linonga nimbe tenderimumunga Goteni na koinjo molko kondoko kau pani owi nimu ulumu paa liemboi nimbo na umbuni lipe tirimo melema wendo wendo lipo ltepo, mulu naa pilipo we mele lupema konopuni naa pilipo owe torumuna pumboindo enge nimbo lkiro.

¹⁵Lino Kraistingu imbo lipe manjili moromoloma pali i nio ulumu tepo molamili. Molo enonga imbo maren i nio mele paimbo nimo ningona naa pilko konopu lupe lienge lemo eno konopuni paimbo ungu pilenge mele Goteni lipe tumbi tindimbelo. ¹⁶Nalo ulu pengama teamili i teli oi nimbo tepo moromolo mele tiye naa kolopo paa kamukumu aku tepo enge nimbo tepo molamili.

¹⁷Ango kame, enoni pali nani tero mele manda leko teko molaio. Lino tepo moromolo mele penga teko manda leko teko moromele imboma wamongo kanoko lombieio. ¹⁸Oi wali awini nani enondo i tepo nimbo tiru. Imbo awini Kraist kolorumu unjo polopeyamu kinye opa pulema moromele. Kano imbomani teko kenjirimele ulumani Kraist unjo polopeyana lino lipe tapondopa kolorumu engemu ulure naa teremo nimele nimbo tiru akumu kinye altopo kola tepo eno nimbo tiro. ¹⁹Eno mai kolonge uluma kapi ningonulu pengama ningonu, maina melema kau konopu kimbo tiko moromele. Eno kangindo uluma enonga Gote mele ningonu pimelemunga waliwalima molko kenjiko kau puli kombu kerina punge. ²⁰Nalo lino mulu kombuna imboma moromolo. Lino Lipe Tapondombalo Iye te, akumu Awili Jisas Kraist, yuaku mulu kombuna maindo ombalie lino lipe mepa pumbelo nimbo konopu tipo nokopo moromolo. ²¹Aku wali yunge enge peremonayu melema pali topa mainye mundupe yu pange tendepa molombalo. Enge akumuni linonga kangi lino umbuni tirimoma kolo wangopa yunge kangi none teli paa pengama lino timbelo.

4 ¹Akumunga, nanga ango kame, na konopu mondopo paa eno kanamboa nimbo kondo kolopo moro imboma, na eno kinyekongonomu terumunga eno nanga mele kaloli pengamu moromelemunga tono kolopo moro imboma, nanga pulu ltemo imbo konopu mondoroma, Awili Kraistini aku tepa eno kinye manda tembalokani pilkolio eno Awilimutie naa kolko enge ningonu ambolko molaio.

Poloni Filipai imboma ungu mane tipelie eno konopu tendekuna pupili molaio nimu

²Ambo Yuodia kinye Sintike talo, Awilimunga imboma molangei nimbe peremo ungu manemu mele elo aku teko Awilimunga ambo talo

morombele kani konopu tendekuna pupili molalio nimbo elo paa walipo pilto.³ Nanga kongono tendeku iyemu, nunge imbibunga pulumu pilkolio kopu tepo peya kongono terembolo paimbomu nuni ambo talo tendeku tiko molangili ningi liko tapondani nimbo konge tero. Imbomanि ungu pengamu pilengei ningi elo na kinye peya kopu tepo kongono mindili nombo tepo molorumulu kani aku teani. Iye Klemen kape imbo mare peya kopu tepo andopo kongono terimulula, aku imbomanga imbima koinjo molko kau punge imbomanga imbima moromolo bukuna moromo.

⁴ Eno Filipai imboma, Awilimu kinye kopu teko moromele kani waliwalima tono kolko molaio. Altopola nio. Tono kolko molaio. ⁵ Awilimu eno moromelena nondopa ombai teremo kani enoni imbomanि tek keninge wali eno welea tepo iri topo enge nimbo mane naa tipo, imboma taka lipo lipo tapondopo moromolo mele imbomanि pali kanangei ningi aku teko teko molaio. ⁶ Eno mele tengen konopu kimbo naa tieio. Enonga melema kinye uluma kinye enonga konopuna umbuni teremoma pali Gote ningi para tiko, yu kinye tapoi ningi konge tekolio yu kinye paa tereno ningi, aku teko ningi molaio. ⁷ Aku tengen kinye Goteni eno konopu u nili ulu tirimomu, kanomu imbomanि manda naa pimele, kano u nilimuni Kraist Jisas kinye kopu teko molangei enonga konopuma nokombalo.

⁸ Ungu te kamukumu nembo. Ango kame, ulu paa penga olandopama, imbomanि kanokolio konopu tiko kapi nimele aku tepa uluma kau konopu kimbo tiko pilko molangei. Ulu paimboma kinye, imbomanि kanoko penga pimele ulu tumbi nilima kinye, ulu kalaro naa mololi uluma kinye, imbomanि pilko penga pimele uluma kinye, kanoko teko kondorono nimele uluma kinye, aku tepa uluma kau konopu kimbo tiko pilko molaio. ⁹ Nani eno mane tiro pileringi mele kinye, ulu teroma pilko karomele mele kinye, aku uluma eno waliwalima teko molaio. Aku tengen wali konopu u nili ulu pulumu peli Gote eno kinye molombalo.

Filipai imbomanि melema we tiko munduringimunga Poloni konopu tipe paa teremele nimu ungumu

¹⁰ Na Awilimunga iyemu molopolio enoni na kondo kolko tingei teringi mele akuma altoko teringimunga paa konopu tiro. Oi paimbo lipo tapondamili ningila nalo liko tapondongei aulke te naa lerimu. ¹¹ Na melema molo ltemona naa nio. Ulu lupe lupe keri pengama na kinye wendo oromo wali ulure molo, aku uluma mandala nimbo konopu kimbo tipo pilipo naa moro. ¹² Na wali mare melema molo ltemo mele kape, wali mare melema awini amboro mele kape pilipo moro. Nalo na langi awini ltemo walima kape engele ltemo walima kape, melema molo ltemo wali kape mele awini noiro wali kape, ulu keri pengaaku tepama pali na kinye wendo oromo wali ulure molo nimbo taka lipo moro. ¹³ Kraistini na enge tirimo aku engemuni na uluma pali manda tero.

¹⁴ Akumu paimbo nalo eno na kinye popo tiko nanga umbunima meringi aku ulu pengamu teringi. ¹⁵ Eno Filipai imbomani pimele, nani oi pulu polopo ungu pengamu nimbo tilipo andopolio eno moloringina ombo nimbo tiru pileringi kinye altopo enonga kombu Masedonia provins tiye kolopo kombu lupe marenga puru kinye enoni kau na liko tapondoko kou mone mare tiko munduringina ltiu. We Kraistinga imbo talape lupe mareni naa tiringi. ¹⁶ Masedonia provins oi tiye naa kolopo ulke kombu Tesalonaika pumbo moloru wali kape na melte naa ltemo ningi wali mare eno Filipai imbomani liko tapondoko melema tiko munduringila. ¹⁷ Na melema we tiengenai nimbo konge tepo naa nio. Na liko tapondoko melema we tingemunga Goteni eno mele pengama olando timbelo linge, aku kinye na konopu timbo nimbo aku tepo nio ¹⁸ Akumunga melema pali tingemunga pipiamu i topo tiro. Melema tiringi ltiu akuma na molo lerimu melemanga olandoko tiringi ltiu. Kinye Epafroditusini eno mele tiko munduringi mendepa orumuna ltiumunga na mele paa pulumu noiro. Aku melema tinge, lino Gote popo tomilindo mele kalopo tirimoloma Goteni mune pilipe penga pilipe limo mele aku tepa kano melema popo topa kaloli melema mele yuni kanopa penga pimo. ¹⁹ Kraist Jisasini enonga nimbe tenderimuna yunge imboma moromelemunga, nanga Goteni mele koinjo koinjo penga pulumu noirimomanga mare eno mele molo ltemoma pali noiengenai nimbe timbelo.

²⁰ Waliwalima linonga Ara Gotenga imbi lipo ola mundupo yu kapi nimbo mololipo kau pamili. I paa.

Poloni pipiamu topa pora timbeindo eno molko kondaio nimu unguma

²¹ Eno Kraist Jisasinga imboma pali nani molko kondaio nio. Na kinye peya moromolo anga kameni kape eno molko kondaio nimele. ²² Gotenga imboma pali, Rom iye nomi king Sisaramunga ulkena peremelema kinye peya, enoni molko kondaio nimele.

²³ Awili Jisas Kraistini eno kinye konopu noipe enonga minima tepa penga tepili. I paa.